

Na osnovu člana 174. stav (5) Zakona o zaštiti i spašavanju ljudi i materijalnih dobara od prirodnih i drugih nesreća ("Službene novine Federacije BiH", broj: 39/03, 22/06 i 43/10), člana 65. stav (1) tačka 3) Uredbe o sadržaju i načinu izrade planova zaštite i spašavanja od prirodnih i drugih nesreća i planova zaštite od požara („Službene novine Federacije BiH“, broj: 8/11), člana 3. tačka 6. Odluke o organizovanju i funkcioniranju zaštite i spašavanja ljudi i materijalnih dobara od prirodnih i drugih nesreća na području Grada Tuzle ("Službeni glasnik Općine Tuzla", broj: 8/08, 4/11 i 1/13, "Službeni glasnik Grada Tuzle", broj: 1/17, 9/19 i 6/23) i člana 41. i 138. Statuta Grada Tuzle ("Službeni glasnik Grada Tuzle", broj: 6/21 i 4/25), na prijedlog Službe civilne zaštite Grada Tuzle, Gradonačelnik Grada Tuzle, donosi :

ODLUKU

o donošenju Plana zaštite i spašavanja ljudi i materijalnih dobara od prirodnih i drugih nesreća grada Tuzle

Član 1.

Ovom Odlukom donosi se Plan zaštite i spašavanja ljudi i materijalnih dobara od prirodnih i drugih nesreća grada Tuzle (u daljem tekstu: Plan zaštite i spašavanja).

Član 2.

Sastavni dio ove Odluke je dokument Plan zaštite i spašavanja, na koji je Gradski štab civilne zaštite prethodno dao pozitivno mišljenje.

Član 3.

Plan zaštite i spašavanja se čuva u Službi civilne zaštite Grada Tuzle.

Član 4.

Zadužuje se Služba civilne zaštite Grada Tuzle da jedan primjerak Plana zaštite i spašavanja dostavi svim gradskim službama za upravu i upravnoj organizaciji Zavod za urbanizam radi realizacije mjera zaštite i spašavanja i drugih zadataka utvrđenih u Planu zaštite i spašavanja u oblasti za koju su osnovane, a koordinaciju aktivnosti na vršenju tih zadataka ostvaruje Služba civilne zaštite Grada Tuzle.

Član 5.

Ova Odluka stupa na snagu narednog dana od dana objavljivanja u "Službenom glasniku Grada Tuzle".

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
GRAD TUZLA
Gradonačelnik

Broj: 02/40-A-2035-225
Tuzla, 25. 12. 2025. godine



OBRAZLOŽENJE

I - Pravni osnov za donošenje Odluke

Pravni osnov za donošenje Odluke o donošenju Plana zaštite i spašavanja ljudi i materijalnih dobara od prirodnih i drugih nesreća Grada Tuzle (u daljem tekstu: Odluka) sadržan je u odredbama člana 174. stav (5) Zakona o zaštiti i spašavanju ljudi i materijalnih dobara od prirodnih i drugih nesreća ("Službene novine Federacije BiH", broj: 39/03, 22/06 i 43/10) (u daljem tekstu: Zakon o zaštiti i spašavanju), člana 65. stav (1) točka 3) Uredbe o sadržaju i načinu izrade planova zaštite i spašavanja od prirodnih i drugih nesreća i planova zaštite od požara („Službene novine Federacije BiH“, broj: 8/11) (u daljem tekstu: Uredba) i člana 3. Odluke o organizovanju i funkcioniranju zaštite i spašavanja ljudi i materijalnih dobara od prirodnih i drugih nesreća na području Grada Tuzle ("Službeni glasnik Općine Tuzla", broj: 8/08, 4/11 i 1/13, "Službeni glasnik Grada Tuzle", broj: 1/17, 9/19 i 6/23) i člana 14. i 138. Statuta Grada Tuzle ("Službeni glasnik Grada Tuzle", broj: 6/21 i 4/25).

Odredbama člana 174. stava (5) Zakona o zaštiti i spašavanju propisano je da općinski plan zaštite i spašavanja od prirodnih i drugih nesreća donosi općinski načelnik, na prijedlog službe civilne zaštite općine. Odredbama člana 65. stava (1)-tačka 3) Uredbe propisano je da planove zaštite i spašavanja opštine donosi opštinski načelnik na prijedlog opštinske službe civilne zaštite usaglašen sa opštinskim službama za upravu. Odredbama člana 3. tačka 6. Odluke o organizovanju i funkcioniranju zaštite i spašavanja ljudi i materijalnih dobara od prirodnih i drugih nesreća na području Grada Tuzle ("Službeni glasnik Općine Tuzla", broj: 8/08, 4/11 i 1/13, "Službeni glasnik Grada Tuzle", broj: 1/17, 9/19 i 6/23) propisano je da u ostvarivanju prava i dužnosti u oblasti zaštite i spašavanja, Grad donosi Plan zaštite i spašavanja od prirodnih i drugih nesreća u Gradu.

Članom 41. Statuta Grada Tuzle ("Službeni glasnik Grada Tuzle", broj: 6/21 i 4/25) propisano je da Gradonačelnik u okviru svoje nadležnosti, pored ostalog donosi akte iz svoje nadležnosti, a odredbama člana 138. Statuta je propisano da se odluka donosi, kao akt vršenja prava i dužnosti Gradonačelnika, kao akt za izvršavanje zakona, drugih propisa i općih akata.

II – Razlozi za donošenje Odluke

Plan zaštite i spašavanja se izrađuje u skladu sa Zakonom o zaštiti i spašavanju i Uredbom. Cilj Plana je uspostavljanje jedinstvenog, funkcionalnog i koordinisanog sistema djelovanja nadležnih organa, službi za upravu, jedinica civilne zaštite, javnih i privatnih pravnih lica, mjesnih zajednica i građana u sprečavanju nastanka nesreća, spašavanju ugroženog stanovništva i materijalnih dobara te saniranju posljedica prirodnih i drugih nesreća na području grada Tuzla. Procjena ugroženosti predstavlja temeljni dokument na kojem se zasniva Plan zaštite i spašavanja Grada Tuzla. U skladu sa Uredbom, identifikovani su ključni prirodni i drugi rizici koji mogu ugroziti stanovništvo, materijalna dobra, infrastrukturu i okoliš na području grada. Svaki rizik je analiziran prema vjerovatnoći pojave, intenzitetu mogućih posljedica i kapacitetima za odgovor. Ovaj pregled ključnih prijetnji predstavlja osnovu za planiranje mjera zaštite i spašavanja u sve tri faze djelovanja – preventivna zaštita, spašavanje i otklanjanje posljedica – te omogućava usklađenu, efikasnu i ciljanu primjenu operativnih i tehničkih resursa u situacijama prirodnih i drugih nesreća.

Odredbom člana 66. stava (1) Uredbe propisano je da planovi zaštite i spašavanja podliježu obavezi redovnog ažuriranja, koje se vrši onda kada se u odgovarajućoj procjeni ugroženosti ili u programu zaštite i spašavanja izvrše odgovarajuće izmjene suštinskog karaktera koje utiču na promjenu rješenja utvrđenih u planu zaštite i spašavanja.

U toku 2025. godine je izrađen dokument Procjena ugroženosti od prirodnih i drugih nesreća grada Tuzle, koji sadrži izmjene suštinskog karaktera koje utiču na promjenu rješenja utvrđenih u Planu zaštite od prirodnih i drugih nesreća grada Tuzle koji je 2021. godine izradila Agencija za zaštitu ljudi i imovine „INZA“ d.o.o Sarajevo, u okviru projekta „EU za bolju civilnu zaštitu –Izgradnja kapaciteta i priprema BiH za mehanizam civilne zaštite EU“, finansiran od Evropske komisije.

Rješenjem Gradonačelnika, broj: 02/04-A-17471-2025 od 31.10.2025. godine, formirana je Radna grupa za ažuriranje i izradu prijedloga planskih dokumenata zaštite i spašavanja grada Tuzle, te se pristupilo izradi Plana zaštite i spašavanja.

Služba civilne zaštite Grada Tuzle je prijedlog Plana zaštite i spašavanja dostavila Gradskom štabu civilne zaštite, koji je nakon razmatranja dao pozitivno mišljenje, te Služba civilne zaštite dalje predlaže Gradonačelniku donošenje Plana zaštite i spašavanja ljudi i materijalnih dobara od prirodnih i drugih nesreća grada Tuzle.

III – obrazloženje pojedinih odredbi Odluke

Članom 1. i 2. određen je predmet Odluke i da dokument Plan zaštite i spašavanja čini njen sastavni dio.

Članom 3. određeno je da se Plan zaštite i spašavanja čuva u Službi civilne zaštite Grada Tuzle, što je u skladu sa odredbom člana 69. tačka 3) Uredbe, kojom je propisano da planove zaštite i spašavanja i planove zaštite od požara grada čuva gradska služba civilne zaštite.

Članom 4. određene su dužnosti i zadaci, što je u skladu sa odredbom člana 174. stav (6) Zakona o zaštiti i spašavanju kojom je propisano da realizaciju mjera zaštite i spašavanja i drugih zadataka, utvrđenih u planu zaštite i spašavanja općine, vrše sve općinske službe za upravu i drugi organi općinske uprave, svaka u oblasti za koju su osnovane, a koordinaciju aktivnosti na vršenju tih zadataka ostvaruje služba civilne zaštite općine.

Članom 5. određeno je stupanje na snagu Odluke.

Obradivač:

Služba civilne zaštite Grada Tuzle